

國
朝
詞
綜
補

國朝詞綜補卷三十七

無錫丁紹儀杏舫輯

唐壽萼

補詞一首

黃景濂

六首

汪元浩

補詞二首

汪元治

補詞一首

姚椿

補詞三首

姚棣

一首

王修埏

一首

張方川

一首

張家睿

一首

戴鑑

四首

任安士

補詞一首

姚前樞

六首

張爾旦

補詞十首

時宗直

一首

吳嘉亨

補詞一首

吳基枋

一首

劉涿之 一首

沈彥曾 四首
補詞

楊汝燮 十首

張 灤 一首

吳熙載 三首

唐壽萼

字護伯吳江人諸生有緣語樓詞

探春慢

上元節後春寒甚力澹日微陰時有雪意賦此遣懷

雲軟棲檐雨輕泣砌東風如此淒緊金鴨香溫綠梅笑
淺盼斷芳韶無影流水昏鴉外正寂寞溪山催暝剪刀
初試封姨漫天亂絮零粉 又是春燈落去想霧閣陰
陰飄墮蘭燼翠釵長拋繡衾悄擁笑說江南春冷嬾與
尋芳約任別院黃鸝三請靜掩重門夢痕搖蕩煙艇

黃景濂

字亦宋鎮洋人
諸生有友蓮詞

浪淘沙

心事碧雲空無那秋風閒來行藥到城東記得當年情
話處只隔簾櫳小極間相同盡日愁中海棠瘦損不
成紅一樣謝家庭院裏別夢惺忪

蝶戀花

記疊征帆纔一瞬春夢如雲聚散渾無準昨夜酒闌偏
不省尖風幾陣吹花冷白袷青衫遊客與小閣寒生
瘦到紗窗影怪底年年三月病一春心事無人問

綺羅香

鍾淵映刀尺伯鵬圖

秋靜燈涼菊衰影淡卻好銜杯時候欲話同心莫怪疎
狂依舊儘爛醉刀尺聲中解清愁行吟倦後想風前翠
袖生寒更將蕉酌勸卿否 蕭齋空自兀坐記得攤書
深夜鳴機人瘦自帶天涯此景依稀難又悵客久玉軸
頻拋念衣單金針誰繡只一尊清漏沈沈喚教明月侑

疎影 菊影

風淒日暝有疎枝繁蕊無限神韻移向窗紗看不分明
待蹋霜華相趁幽芳不合籬閒老暫寄跡輕塵微暈記
昨宵冷照屏山低壓箇人雲鬢 無那惺忪易去落英
又此夕空憶圓鏡簾外西風簾內銀燈瘦損腰圍誰問

還看月落銷魂處更閃壁涼波如浸算而今過了重陽
留得夢痕清瑩

摸魚子

寄姚竹卿

近重陽滿城風雨年年秋在愁裏狂歌痛飲浮名外不
管拋來鄉里歸也未盼翠袖天寒修竹無言倚沈寥如
此又窗眼星沈屏山漏永昨夢渺難記飛鴻影結得
同心語子天涯差慰孤寄持螯把盞簪花約誤了驪歌
催起游倦矣但一卷叢殘料理疎燈底吟箋勤遞正我
惝眊城君行茂苑小別悵如水

滿庭芳

夢花

菱沼絲乾菇灣葉老疎紅漸徧江皋殘陽低映客易惹
魂銷縮得愁心一縷池塘外柳線輕撩金風度斜斜整
整悄舞最無聊自開還自褪停辛佇苦爛漫今朝映
星星漁火添得飄蕭賸有芙蓉相伴含幽怨欲采還遙
分明處脂痕幾點微暈帶春潮

汪元浩

字孟然
鎮洋人

清平樂

夢過落花庭院約略記之不勝淒眷

寂無人凭舊日闌干影花落閒庭春晝永梁燕也都飛
盡只餘滿徑蒼苔依然綠上階來分付奚奴休掃記
曾襯過弓襪

齊天樂

秋聲

非雲非霧非嵐氣。遙看半空籠住。似淡偏濃。乍分仍合。秋在極模糊處。輕綃萬縷。織一幅瀟湘畫圖。如許踏葉人歸。斷紅橋外。易迷路。依稀蘆雪捲起。聽歌聲緩緩。漁艇搖去。水際將消。林端又起。欲斷還連。情緒蒼茫。釣浦間短笛誰橫喚醒。眠鷺幾陣。風絲滿天。篩細雨。

汪元治

字珊瑚。漁鎮洋人。有結鐵網齋詞。

國香慢

自題畫蘭

那不生憐。看柔條嫩葉。直恁芳妍。孤根本藏空谷。種自何年。生怕騷魂化去。儘移來。供養窗前。無言靜相對。楚

些微吟愁影娟娟。替伊閒寫照。被幽香一縷飛上毫
顛。煙濃墨淡。仙姿似怯輕寒。欲問湘江舊事。奈湘娥不
在人閒。啼妝翠痕溼。漫把淒涼譜入冰絃。

姚

椿

字春木婁縣人
監生有灑雪詞

綺羅香

題張仲雅三影閣筆語

紫玉輕敲紅牙淺。招唱出傷心如此。陌上歌殘又惹竹
西清吹玉鉤斜。殿腳三千玉簫聲。橋頭廿四羨張郎風
度。依然怪他楊柳易憔悴。蕪城無限別緒。還有莎堤
草色青。招歸思。秦女高樓。莫更緊攏纖指。祇恐他彈徹
銀箏。終不抵。串成珠字。再休教腸斷。方回淚飄梅雨膩。

摸魚兒

詞庭朱子鶴以萬竹樓詞見示倚此奉寄

淨湖天淥波如鏡晴巖恁地明秀爛銀盤裏流清永無
數碧螺峯皺杯在手間七十二青巒一一知名否君非釣
叟祇簞笠蓑衣筆牀茶竈此福暫消受 人間事付與

巨區醇酎家庭樂事多有樓頭萬竹風鳴軸一笑此君

依舊

君有倪迂萬竿煙雨圖以名其樓

仙挹袖請試校圖中風貌誰清

瘦新詞脫口正欵乃聲遙楚吳地肺喚起柳州柳

予兩泛湘

江方自楚旋里

滿江紅

題葉桐君聿城漁唱圖

試問先生何事向海天長嘯有幾許波濤詞筆江湖懷

抱萬卷自堪南面擁一邱更寄東山傲又何妨蓑笠仿
元真漁歌調 石林路君家好峯泐夢吾鄉繞呼浪翁
漫士任教嘲笑仕宦中年朝市隱潮洄隨處煙波杳卻
防他漁父遠尋來仙源棹

姚

槌

字建木婁縣人官知縣

滿江紅

和葉桐君漁唱詞次顧卿裳韻

指點洪濤須記取放舟宜近隨意著綠蓑青笠布帆拴
穩寬水養魚源自活急湍捩舵風偏緊記曾經縱棹太
湖濱探芳訊 香雪海捐脂粉靈巖石留鬚鬢任馬牛
呼便驚鷗盟準烽火叢中閒釀酒鼓鼙聲裏猶分韻信

天翁一笑嬾移居。休相晒。

王修垓

字友山。秀水人。官福建。縣丞。有小蓬壺笙語。

春霽

題許克華蘿月山館詞。

檀板頻敲。羨氣鬱青霞。詞追白石。蘿補茅齋。梅芬樵社。
聲華有誰堪敵。夢傳彩筆。年來暫息。搏風翮。且悄匿。福
地瑯嬛。吹徹倚樓笛。長吉古錦。囊括珠璣。燕銜零紅。
魚戲空碧。更當筵。揮毫落紙。興酣五岳。盡搖兀。我似江
淹才已竭。惟有把酒靜聽。二八嬌鬟。歌君新闕。畫旗亭
壁。

張万川

字餘山。餘姚人。官府經歷。

高陽臺

題家松溪花影吹笙詞時與同舟自淮南旋

一幅蛟綃千重鹿錦何時收入奚囊酒畔花前嬌喉歌
損紅妝天涯是處留鴻跡廿年來飽歷風霜最難忘殘
雪西山暮雨橫塘 生花筆奪湖山秀似風流柳七瀟
灑秦郎減字偷聲音流一片宮商扁舟共擊中流櫓甚
霎時勞燕分翔願須償春草生時夜雨聯牀

張家睿

字十峯妻
縣人監生

洞仙歌

題紅橋尋夢圖

紅橋煙軟憶吳天春夜明月清風美無價翠簾知幾曲
曲曲回環燈一點應識那時閒話 香溫茶更暖報道

花開開到榴花又初夏休怪帶痕移重對壺觴渾不似
夢中亭榭算斷夢須圓甚時圓怕負了垂楊惹流鶯罵

戴

鑑

字石坪濟甯人
有潑墨軒詞

浣溪紗

路轉山原步步高林煙過午未全消短垣幾簇露花梢
桑圖雨晴鳩婦喜麥疇風暖雉媒嬌夕陽斜處水平
橋

踏莎行

芳草沿堤垂楊繞岸殷紅淺碧誰家院游絲百尺裊斜
陽輕盈故向東風轉庭列瑤階屏開繡扇珠簾翠箔

深深見畫堂春晝靜無人杏梁棲穩雙飛燕

荊州亭

夜雨

簷溜丁東不止繞樹寒鴉驚起一點一聲聲滴入愁人
心裏斷線珍珠亂委溼濺楞楞窗紙轉側睡難安夢
也有頭無尾

齊天樂

湖上用史梅溪韻

爪皮艇子停雙槳匆匆順風吹去蓮葉擎珠蘋花凝淚
剛好薄雲篩雨閒情幾許過射鴨陂塘撈蝦洲渚隔浦
依稀有人繫纜水邊樹回思前事似夢翠濤斟玉斝
那日曾聚沙角鳧眠浪心鷗戲不見青鸞毛羽箏移雁

柱奈絃索悽然歡期頻阻記得同遊採菱聞笑語

任安士

字禮塘
宜興人

浪淘沙

驚

綠到柳絲閒便已綿蠻猜來語有許多般似說流光飛
電逝一霎春殘有酒有雙柑儘著追歡雨偏容易日
偏難宛與林花同命薄只遇春寒

姚前樞

字古然金山人諸
生有紅林禽館詞

柳梢青

柳外鶯囀紅闌深苑碧草芳池正憶江南漫天飛絮梅
子黃時幾番催放荼蘼惜花片鄰園亂飛贏得牆頭

一雙蝴蝶賭曬春衣

城頭月

偶憶江鄉風景

故園橘綠橙黃矣。好事從頭記。綠酒親溫。香臍替擘。多
感纏綿意。虛勞錦段回文字。霜冷金鈴地。閒裏谿山。
忙中書畫。都變相思味。

瑣窗寒

春雨

困柳欺晴半。縈衫葉半。篩簾影著意圍鑪寒。比朝來還
勁訝溟濛吹入花房。一痕粘住蜂鬚冷。漸琴絲拂潤柳
眼橫波攪愁細聽。寂靜剔鐙燼想樓上無眠較量紅
杏漁槎枯水暮寫披蓑清興。正山家破竈煎茶燒來溼。

葦煙猶暝更那禁漸憑空暗人在雕闌凭

水龍吟

題孫訥齋楚遊草

岳陽樓上秋風洞庭秋水連天起傷心都在臨皋亭畔
細腰宮裏江國殘年疏簾殘夢暝寒天氣把新詩唱與
酒家傭保莫偷溫英雄淚休說東坡有弟慘關河雁
行零替料應警省蠟銷鐘墮對牀滋味聞道吾家二妃
墓下竹斑還漬問黃陵古廟野花延蔓上顏垣未

東風第一枝

試鐙夕用湖海樓韻

濁酒停斟胡琴罷弄閒愁將放何許窺窗梅萼初開映
簾月波乍吐年時豫卜早喜是中秋無雨記相約射覆

藏鈎攜手畫樓深處 判此際試鐙笑語誰料尙背鐙
愁數空箱疊徧春衫枉費閨中絲縷鄰家歌管怕聽說
團團三五趁夜分夢到伊邊還帶啼痕歸去

沁園春

鍼線帖

梳掠剛停刀尺慵拈含情曲房記乍開包裹牀安翡翠
偶繡摺疊譜繡鴛鴦鬪草無心意錢卻伴總爲工夫壓
線忙東風軟揀花深深處狼籍鋪將閒邀姊妹評量
趁燈火紅閨蘭夜長算嫁得金龜拋殘針管描成彩鳳
誰與端相四角凹多中央凸易飽簇香絨亂不妨愁何
限展蟬聯不斷獨自迴腸

張爾旦

字眉叔常熟人諸生有種玉堂詞

浣溪紗

落葉西風作

去

晚晴到黃昏又冷清秋聲一院翦燈

聽

蓮漏漸沈香漸燼吟蛩初歇酒初醒不堪殘夢憶

零星

踏莎行

玉山治春詞

買醉鶯呼尋香蝶趁一條翠沒紅邊徑東風吹活半山
雲髻鬢聳露孤峯頂刻竹題新櫨芳游俊飄殘豔雪
苔坳淨誰家庭院夕陽黃楊花蕩得春無影
相見歡

珍珠箔底相逢步弓弓恰好日華斜射臉霞紅
屏山曲蛾彎綠夢雲空化作去聲一絲香瘦裊東風

虞美人

柳絲難把春縈絆一夜風吹亂落花惘惘蝶依依惱煞
夕陽庭院有鶯啼相思不合花中住昨夢無尋處小
紅闌角綠陰圓便是不曾春去也悽然

醉花陰

送春後一夕

樹暗庭心濃綠厚蟾影纖纖漏怎不似前宵月也和人
過了殘春瘦迴廊幾曲都憑轂雲外山眉皺已是不
勝情笛況淒然酒又醒時候

玉燭新

青溪聞笛

疏煙縈碧柳。正水閣飄燈。嫩涼時候。素蟾光透。天無語。
幾點星稀如豆。闌干凭轂。聽細裊。一絲秋瘦。間立向紅
板橋頭。遙山翠眉先皺。六朝舊夢都非。賸斷雁零蟬。
送愁依舊。笛聲況又。弄哀怨。似勸天涯回首。臨風望久。
恨不見。隔花雙袖。還最憶。簾底銷魂。曲終喚酒。

百宜嬌

風日散晴林。花爭笑。連朝病酒。情緒無聊。漫賦是解。不自知意之何指也。

綺夢如煙。病懷中酒。消損幾年誰管。梅杏香邊。燕鶯聲
裏。又做一番淒斷。東風太緊。聽玉笛。誰家孤按。悄無人。
只有斜陽。晚來猶戀庭院。難得是。春歸緩緩。多事惱。

啼鵲要將歸勸。瘦已如花。對花何況。憶箇如花人遠。尋芳浪約。便不爲傷春也倦。奈開簾。更自撩愁。看飛紅亂。
長亭怨 暮春出游吳瘦青相就話別輒賦此解

正開徧桃花千樹。更向天涯看飛紅。雨買箇烏篷替搖詩夢。渡湖去已憐春好。奈人似春風絮絮。便慣飄零。羨化作池萍還聚。且住甚聲聲怨笛。隔夜暗催離緒。柔波翠淺。算怎抵愁深如許。縱豫約放權。相迎怕已有霜鴻哀語。儻欲話相思。須盼秋江歸旅。

八聲甘州

補君宿甫。頌滿工書善畫。年甫廿餘。遽逝其室人。季湘娟亦工詩畫。哀其遺翰成帙爲題。是解有降乩者云。君本上清侍書。今仍在仙籍。故詞中及之。

似落花狼籍故人魂飛去不能招只銀鈎瘦樣香濃墨
淡頻展無聊忍憶十年前事除是夢相邀淒雨寒煙裏
夢也迢迢 賸有吹簫舊侶把叢殘遺翰讀當離騷歎
情長絲短彈淚溼生綃間遙天玉樓今夕對孤蟾還記
可憐宵相思字蠹魚能蝕此恨難消

梅子黃時雨

春事漸深病酒懷人不能已已

隔水春聲正疏笛乍飛亂鶯流語算暗裏春來恨花難
拒花信連番春洩漏片魂欲共游絲去東風煦雲弄碎
陰飄斷柔縷 無據懷人情緒但斜陽送暝閒了庭宇
泊淺醉醒時易吹紅雨扶徧迴闌天影黑澹黃楊柳昏

鴉聚春何許一痕夢搖飛絮

時宗直

字梅坪
濟甯人

沁園春

讀戴石坪遺詞

一卷攜來潑墨新編盟被誦之似瀾回蓬渤尾閭儘納
雲生泰岱膚寸爭奇鐵板輕敲銀笙巧奏賦柳豪蘇筆
一枝誰爲是是石坪畸士黃絹妍詞更憐畫癖書癡
憶淪茗論文興到時慣爲人作嫁低皺白練頻年清課
親界烏絲未免有情不堪回首老去惟餘硯付兒長吟
罷嘆高山流水珍重鍾期

吳嘉亨

字禮堂吳
縣人貢生

齊天樂

碧痕曲護重簾靜輕煙散成絲雨絮冷春濃花深夢窄
逗起瑤情幾許吟魂無主拚一寸心香共銷蘭炷牋研
烏闌細研薇露織愁句華年嗟似逝水東風難繪影
纖恨何處鏡裏擷雲尊前蠟淚都付紅樓簫譜宵長月
午怕調轉梅邊亂英飛舞寄語雙鸞曼聲防燕妒

吳基枋

字柳堂江蘇
華亭人監生

齊天樂

蟬

夢痕未了齊宮怨高槐遠聞淒調曲院風清長亭雨歇
惹得閒愁多少聲聲旋繞正映著斜陽冰紗翼小鏡裏

偷描箇人鬢影自娟妙 梧桐乍驚葉落甚餘音嘒嘒
催起秋早郭北村南水邊籬落一片疏煙衰草浮生易
老閒社賭油蟲誰家音好夜靜孤蛩替伊吟到曉

劉涿之

字彥冲銅山人監生

浪淘沙

溫浦送客圖

映水是平沙過盡歸鴉青衫紅燭對咨嗟送客不知身
是客卻望天涯 舊日莫愁家今夜琵琶潯陽江上月
初斜不信悲歌頭易白請看蘆花

沈彥曾

字士美號蘭如長洲人諸生有蘭素詞

如夢令

門外馬聲吹動酒意消愁微中惜別更無言只道一聲
珍重相送相送今夜鴛衾孤擁

桂枝香

蘇軾

編蒲製就聚一簇團圓寸絲難漏採近秋風隔歲漫勞
纖手織來紅影篝燈外映簾櫳翠紋初皺玲瓏好貯柔
桑重疊細鋪輕覆喜漸近芳春暖晝正飼葉人忙三
眠時候熨貼鑪薰溫火焙烘微透今番商略分筐早鬪
新蛾須認肥瘦恁般清課綠窗諸女料應停繡

齊天樂

新春集半樹書屋賞梅

更何人倚銀屏坐春衫嫩寒猶滯寄語東風疏籬那角

開了舊梅花未酒濃容易更翠織愁痕玉笙吹細影寫
簾波鵲鑑靜裊篆煙膩一聲鐘響送暝人家斜水閣
鷗外涼意大白還浮小紅誰唱重譜新詞偷記綺懷難
洗早寫出瑤天碧雲飛起拚醉金樽燭消蘭夜裏

東風第一枝

璘文閣探春

雨過收燈花催擊鼓尋春春事初好東風記約嬋娟巷
曲鈿車迎早金尊頻勸問抵得愁多愁少儘憐他豔影
雙行百寶鬪妝誰巧都分是碧城信杳容易煞翠樓
人老琵琶待說重聽忍憶舊時素抱消魂難賦且領略
鬢蟬香繞更明朝穩載桃根莫放畫船開了

楊汝爕

字湘槎無錫人諸生

春光好

蛾黛繚怯春風下簾櫳
鸞釵斜亸鬢雲鬆
臉霞紅
早是懨懨仍睡小
鬢未解愁衷
卻道困人天氣暖
曉妝慵

浣溪紗

袖底紅巾裹指尖
不彈珠淚向花前
怕花憔悴損花顏
滿院尙留香宛宛
隔簾初住雨
纖纖苔痕青到茜裙邊

巫山一段雲

窗外鶯聲碎
池邊草色新一彎
淡抹遠山痕
低斂似眉

顰 插鬢花愁瘦熏衣麝怕溫東風吹老眼前春腸斷
倚樓人

眼兒媚

淒涼獨倚玉闌邊
嬾整舊釵鈿
許多閒事纔添香屑又
上琴絃
語風莫攪鴛鴦夢池畔正雙眠
數層波縠千條菰線幾箇荷錢

清平樂

暖回繡戶昨夜寒如許
粉蝶穿籬忙不住
一霎花開滿樹
鏡邊正挽香鬟檀郎遊倦初還
聽說春山多媚
今朝倩畫春山

天仙子

小立瑤階嫌露冷。愛看月明圓似鏡。手扶羅幙上銀鈎。
闌獨凭。傷春景。吹落梨花風不定。深院漏殘人乍靜。
前夜夢兒空記省。卸頭燈背未眠時。心欲併肩還並笑。
指雙雙。屏上影。

水龍吟

深閨暑氣初消。麗譙敲徧三更鼓。雲屏寂寞。悄然獨立。
含顰無語。綺扇應捐。羅衣纔換。秋清如許。問銀蟾照此。
淒涼瘦影。可一樣添愁緒。聲聲擣寒砧杵。斷離腸有。
誰知苦。遙思此際。平沙曲岸。箇人何處。千里尋踪怎隨。

孤雁夢魂飛度正心傷又是梧桐細雨冷風吹聚

揚州慢

香袖長垂翠樓閒倚捲簾十里新晴聽新腔水調正夜
月初生幾回過臨江竹徑隔煙回首曾認青青算芳春
風景淮南第一揚城而今寂寞紅橋波影空橫自
爛漫花霏風流夢覺莫最多情三十六宮禾黍牆高處
古樹雲平更雷塘淅雨孤舟愁絕殘更

金縷曲

花魂

香徑全無跡悔當初枝頭紅豔未拚攀折恨煞東風吹
欲斷恍惚飄零愁怯誰翦紙天涯招得栩栩莊生蝴蝶

夢在瑤臺玉樹曾相識看難見祇空憶 眞眞萬徧呼
應出莫悄去綠紗窗裏有人深惜擬拾餘芳埋寸土徧
地春痕難覓只一點靈犀未滅芳草依棲渾不定鶩聲
聲杜宇啼殘月誰會解此幽鬱

又花影

好景猶堪憶記黃昏月來籬角滿身披拂曲徑蓮鈎頻
踏處愁被輕雲遮得訝簇蕊露零難溼空醒雙雙紅蝶
夢笑朦朧欲把枝兒折恁撩亂總清絕 誰家眷屬情
偏切怪春宵銀燈高照便依詩客嬾娜臨風徧善舞幾
度憐他嬌怯莫錯認明妝靚飾滿地依稀名筆畫只天

工巧極能描出渾不語似曾識

張

潑

字子涵上元人監生

月華清

中秋湖泛次雲礪韻時將回白下矣

匹練橫空紅紗照座正是初涼時節瘦柳枯桐恰傍湖
山停機是誰家水閣玲瓏任露滴荷盤傾折微瞥有花
宮隱隱鐘魚清切一串歌珠乍闕奈隔舫神光向人
離合玉臂添寒歸路香燈纔歇試聽吹廿四橋簫猛想
起十三樓月愁絕正芙蓉江上秋風早發

吳熙載

字讓之儀徵人監生有匏瓜室詞

摸魚兒

癸丑七夕寓邵伯埭作

問天河可能回挽洗將離恨都去雙星未識人閒世今
夕那同前度空自語料不是銀沙怎斷來時路心傷莫
訴鶯鵲噪荒城畢逋予尾瑟縮甚情緒盈盈步尙憶
當筵兒女鍼樓依約如故空階指著同生死要與證
盟休負愁萬縷縱卜了他生先把今生誤匏瓜獨處任
海水枯時昆池劫盡難謝此心苦

金縷曲

癸丑九月詠柳

是處涼蟬咽儘銷魂一行斜照做成淒切露壓煙啼千
萬縷往日青青堪折都付與隨風一葉塵冷梁空飛燕
去待何時重倚朱闌說烏夜起又殘月將軍營外寒

煙結想當時亞夫壁壘一旗春色使節皇華歸騎遠
甚畏征途雨雪正滿目傷心時節莫問靈和春殿事更何
堪還向江潭別空悵望倍騷屑

揚州慢

咸豐三年十二月入揚州郡城作用白石韻

道是還家尋疑重夢黃埃繞遍歸程認荒園獨樹賸幾
點餘青自歌吹繁華日久干戈兒戲民不知兵念蒼生
誰問空教重做蕪城鮑昭去後有坐飛沙石還驚想
鬼伯吹鐙燐青閃壁都是冤情骨肉舊歡安在無人哭
哭也無聲歎飄零身世何堪重卜他生

國朝詞綜補卷三十八

無錫丁紹儀杏林輯

朱綬

十首
補詞

楊懋建

五首

湯成烈

五首

楊懋建

一首
補詞

戴熙

一首
補詞

曹懋堅

五首
補詞

吳珩

一首
補詞

溫肇江

一首

李星沅

一首

沈傳桂

四首
補詞

陸麟書

二首
補詞

符兆綸

一首

朱緒曾

一首
補詞

汪燾

一首
補詞

黃曾

二首
補詞

范如松

一首

項鴻祚

八首
補詞

儀克中

六首

劉家謀

二首

葉元墀

一首
補詞

陳澧

七首

諸嘉杲

一首
補詞

朱

綬
字環之號西生元和人道光
十一年舉人有知止堂詞

愁倚闌令

用晏體

西風起霧沈沈雨悵悵敗柳枯荷千萬響碎人心夕
陽微照寒林暮鐘外催釀秋陰誰在亂煙殘葉裏擣孤
砧

浣溪紗

短舸盈盈泛畫塘綠波芳草似瀟湘玉笙吹徹夢雲涼

還是二年三載約一生禁得幾思量別離人遠柳枝長

唐多令

花落恁匆匆春寒雨更風是誰家金碧房櫳八尺蝦鬚
閒窳地廳共在翠煙中芳序怨飄蓬天涯草色濃有
斜陽不照殘紅甚欲搖鞭無處去空自聽管絃終

清平樂

湖上寄內

聽風聽水冷冷清清意明日好山晴也未早潑一堤涼
翠幾時買屋湖橋分排鏡檻書寮添箇畫鸞衫子水
明簾底吹簫

眼兒媚

今年花發去年時，不是去年枝。一分風雨，二分塵土，暗送春歸。樓頭便是傷心路，煙重綠楊絲。鶯鶯燕燕，無情有恨，各自尋思。

暗香

殘紅

畫闌干側過幾番，暗雨留春無力。一角夕陽，悄與妝樓伴。岑寂溪水流霞漸，香膩脂井都成陳跡。正極目遠樹陰濃，雙燕度遙碧。瑤席間芳澤，付蜀國杜鵑斷魂催。急淚痕暗滴玉卮金鋪，土花蝕空築埋香小塚。煙草暈紅心愁茁，漫記憶游冶地，舞塵自積。

齊天樂 斜陽

韋郎吟鬢看如此無言自成幽抑淡抹危牆寒侵遠浦
幾處管絃催夕憑闌望極漸天影昏黃霽雲濃隔粉豔
金樓六朝多少舊山色 嬋娟尙憐暮景玉釵低度曲
芳思寥寂井廢沈煙樓高墜露惟有一痕愁碧西風漸
急莫渭水長流照人離別暗數流光戍亭聞夜笛

水龍吟 蟹燈

釣鄉十里秋痕乍沈魄月昏黃淺汀蟲咽斷灘禽眠靜
一星還颺編竹支潮移繩結樹水平天遠看澄波墜影
游魚小唼搖不定蘆枝顫 長記清苕游衍響爬沙夜

涼聽慣橋低渚濶幾回曾認市梢人散露艇蓮童風衫
菱女趁明猶轉問何時下柵五湖宅外種香橙滿

徵招

中秋夜秦淮水榭觀月食

人生不合秦淮住銷魂況逢今夕露幔卷黃昏漸秋雲
濃積玉輝圓更寂總無奈桂花香蝕絕似嬋娟鏡昏燈
黯夢深簾隙淒瑟感飄零星河外聲聲斷箏哀笛岸
柳縱無多送霜風消息翠尊人易泣早彈指十年陳跡
殘更近獨掩重門夢霽蟾涼白

高陽臺

南園觀桃花

柔粉煙搓溫脂雪帶新妝欲妒梅嬌小扇單衫吟情飛

上溪橋一春淺醉閒眠裏便看花都是無聊倚斜陽簾
卷誰家雙髻吹簫 鈿車如水歸將盡問佳人何處解
佩晴皋漸綠垂楊絲絲弄影塘坳東風容易過三月寫
愁香空付生綃怕重來嫩葉成陰魂斷難招

楊懋建

字掌生嘉應人道光十一年舉人有留番小閣詞

清平樂

綠陰如海深護鴛鴦睡日日素馨花下醉不信春濃無
賴 銀簧炙暖瑤笙花閒不斷春聲僥幸雙棲雙笑也
須憐我憐卿

柳梢青

記否相逢春山畫裏春影波中繫馬樓臺藏鴉門巷歸
燕簾櫳好春生怕匆匆歌扇底芳心自同藍尾盃深
紅牙拍緊沈醉東風

虞美人

正月十二日宿通遠驛題壁

東風吹得春如夢鞍壓離愁重杏花消息待如何只是
小樓前夜雨聲多破曉試馬長安道帽影鞭絲悄書
生生小慣離家肯爲情長氣短損年華

高陽臺

九月三日秋窗聽雨用有正味齋韻

一桁簾垂一枝燈翦如煙如夢光陰又近重陽秋痕易
上秋襟角巾已悔浮名誤甚傳杯還勸深深奈秋聲不

住如箏彈破蕉心 客窗換盡歌樓味漸寒生斗帳不
耐羅衾縱逼中年誰曾慣聽秋碓櫻桃小院誰家館掩
香匳煮夢沈沈賸而今箇裏淋鈴按拍低吟

珍珠簾

題倪雲璫珠海夜游圖次潘篆仙韻

二分不信春成水託微波一笑江皋留佩月爲有情圓
肯瓊筵坐對銀燭瑤箏邀打槳要喚醒惜花人睡遲睡
趁愁春未醒莫逢醉尉 記得花看長安有夢華瑣錄
蘭成綺歲歸日飲醕醪早爲君心醉曼衍魚龍春漲濶
只障扇緇塵難避休避怕良夜將闌穠花易悴

湯成烈

字果卿武進人道光十一年
舉人官浙江同知有清淮詞

菩薩蠻

落花如雪和愁積垂楊一帶瑤瑤碧芳草太無情春來
處處生 當時攜手處剩有香隨步無那繞花行喚春
春不醒

蕪幕遮

燕交飛鶯解語簾內輕寒簾外廉纖雨無數遊絲攔不
住一片花飛又逐東風去 木蘭舟桃葉渡芳草連綿
認是江南路惱煞啼鴉催報曙歸夢迢迢做也曾無據

瑤華

霧淞

犀帷風避側側輕寒任瑣窗深閉煙銷霧卷晚色淨漸

見一天澄霽疎枝斜插只點點似拋清淚想夜深倚欄
回闌翠袖怯寒知未 窺他素月朦朧視玉砌花明瑤
殿雲綴春魂未醒便做出絮影花光風味冰綃重疊怪
一樣天工輕費漫泥他同夢梨雲檢點細薰鴛被

雙雙燕 榴花

絳英淺吐自深護朱檐不將風怨瑤臺夢醒負卻好春
無限隱約嫣紅幾點恰視得翠雲愁倩憐他蟬鬢簪來
可妒石家穠豔 應羨明妝照眼記蹙損紅巾綠陰初
見分明憔悴怕說酒深愁淺多半相逢覩靦便誤了羅
裙痕澹管取一月薰風日日畫簾高捲

霓裳中序第一

題詞香舊史小影爲沈篠雨同年賦用草窗體

天香銷素魄，修竹檀藥籠。暗碧生怕明蟾易缺，但獨坐深宵，伴他娟潔。珠光映澈，算幾番同倚瑤席。華燈畔，背人低語，執手意淒絕。愁極畫圖重識，忍相看舊遊同說。春明歌舞未徹，恨鶴化梅飛，休問風月。夢魂都竟寂。奈一縷心香，易蕪傷懷處。當年清話，盡付與啼鴂。

楊懋馨

字子振號友麓平湖人道光十一年舉人有閒雲潭影詞

金菊對芙蓉

客中重九

雁蘼楓煙鷗拳葦露四天風色蒼茫正題糕節序簪菊時光白雲未約登高屐但遺愁隨分杯觴水村沙驛幾

株卧柳裝點斜陽 更有甚事迴腸指家山畫裏儘費
思量幸寥寥舊雨尙共蓬窗酒人未覺豪情減且漫尋
蟹舍漁莊還教領取一聲柔艣兩鬢清霜

戴

熙字醕土錢塘人道光十二年進士官兵部侍郎咸豐十年杭州陷殉難諡文節

高陽臺

梧笙唱和詩爲李石梧同年偕其細君郭笙倫同作出以見示倚此奉題

圓角裁箋簾勾鬬韻深闌無限清歡留戀金門年來韻
事都刪湘江一棹攜來穩喜筠奩安近蓬山正天邊似
鏡明蟾掩映團圞 彩毫定得江山助莫輕將院體寫
向烏闌瘦比黃花還應歷例詞壇空齋茶熟香溫候怕
新聲欲和偏難更休教吟到宵分耐盡春寒

曹懋堅

字良甫吳縣人道光十二年進士官湖北按察使有曇雲閣詞

女冠子

霧窗雲幄。小鬟幽蘭香覺。乍相逢。脈脈情無限。佯佯語未通。捲殘蕉葉雨。吹斷藕絲風。應悔從前事。忒匆匆。

留春令

用黃山谷體

情情綠護簾櫳悄。又聽得杜鵑啼了。短簫聲裏送西施。一寸寸紅心老。粉恨珠愁添多少。三三徑翠苔遲掃。相逢等到牡丹時。道占取春休早。

玉漏遲

初寒

露蛩聲又杳。空庭只有昏鴉啼到雪。意三分先是一分。

風悄記起桃鬢舊日喚香餅熏籠添了還自笑翠圍暖
帳從今綠少寂寥且對清尊試說與梅花可能開早
雁字行行寫出玉關悽抱紅牘江楓幾樹付一片荒烟
殘照青鬢好絲絲易催人老

薄倖

凍雲成片夜更靜籠鑪未暖乍記起明燈飄麝一桁湘
簾低倦話春明嘶到斑驄銀尊翠袖匆匆餞看絮影迷
濛段家嶺外一路鉤輦聽徧况又是孤舟裏凝望處
山重水遠吳箋待寄與江南新恨料伊盼着霜鴻轉闊
懷難遣檢巾箱羅帕重看舊日閒針線啼痕在否拚向

東風碎翦。

摸魚兒

魚鼓

捲晴漪翠綸收罷
蓼蓼敲向沙渚
賣鮮聽得江腔熟
一帶枕流窗戶
誰喚住
又四面菱歌蕩入蘆灣
去銀絲趁取
記換酒歸來
隔溪春賽白點社公雨
閒拋網撥刺
錦鱗無數
鳴榔爭響何處蘋洲
幾疊催花發
絕勝柘枝新譜
煙水趣把
答臘餘音留與希真賦
舟橫野渡有鼉
唱初更
蛤蜊荒岸柳外半蟾吐

吳

玠字佩之仁和人道光十二年進士官四川鹽茶道有絃詩讀盡軒詞

摸魚兒

鰓聲

破空江一天秋寂搖搖何處煙艇數聲欸乃沙汀外錯
認雁群呼暝風不定怕十里圓波盪碎蘆花影伊誰慣
聽想水國鷗鳬漁家兒女涼夢屢催醒西泠路最好
湖光掩映綺船宛在明鏡湧金喚渡人歸晚柔響愛他
山應圖畫勝爭奈我頻年遊跡同萍梗燕齊路迴賸夾
岸蛩吟沿溪棹唱和月伴愁永

溫肇江

字翰初上元人道光十
二年進士官戶部郎中

摸魚兒

新秋歸里訪自修長老留餐伊蒲饌慨然
有作

款僧扉開簾小坐園林絕少人跡綠陰不許紅塵到圍
住麋籬三尺湖海客慨游徧天涯不及維摩室秋纔幾

日早竹影堆雲松花糝雪風浣苧衫碧 青精飯分餉
一盂香餼偷閒且樂今夕休論煨芋當年事青史都成
陳跡山那壁有謝傳東山一樣蒼苔溼老僧七十向鶴
語闌時客愁濃處清磬一聲擊

李星沅

字石梧長沙人道光十二年
進士官兩江總督諡文恭

滿江紅

遊辰州龍泉寺次蔡黃樓韻

夢墮寶煙更何處招邀佳勝指龍泉金鋪古刹前生遙
認十萬昏鴉催暮景一雙瘦鶴同僧病倘風流太守肯
重來山靈倖 回廊畔斜陽映經龕內寒鐘隱對龍蛇
滿壁之而猶賸殿閣塵飛青鳥逝江山劫換紅羊燼問

十年宰相信如何。鑪香冷。

沈傳桂

字隱之號聞生長洲人道光十二年舉人有清夢齋二白詞

醉垂鞭

前度別離時。長橋外。長亭內。如雪野花飛。夕陽紅上衣。
重來人不見。春光變。路全迷。何處繫相思。綠楊千萬
絲。

月中行

綠簫吹散楚臺雲。蘭夢倩誰溫。花開還似去年春。不見
去年人。尊前試檢羅衫袖。餘香在。淚墨無痕。小樓明
月又黃昏。銷盡別時魂。

望仙樓

二分流水一分塵。斷送芳妍如許。幾日嫩陰微雨。綠徧江頭樹。翠簾低捲湘紋。人在曲屏深處。燕燕未知春去。對影花閒語。

江月晃重山

鏡檻寒霏玉夜。衫篝暖熨蘭晨。可憐時節可憐人。江南夢。花月不知春。遠道征鈴颭雨。空房寶瑟侵塵。淚香紅減別時痕。離巢燕。猶認舊朱門。

惜分飛

不聽離聲腸已斷。何況青驄去遠。人立梧桐院。滿身涼

露秋宵半。訴徧哀蛩清漏短。夢裏羅綃淚展。悶剔昏
燈看。無言一任風吹幔。

瑤池燕

愁紅吹雨。春無主。處處錦鞍雕轂相遇。當爐女。瓊漿玉
醕。留人住。向幽廊靜檻歡聚。眼波注。團茶淪了重煮。
忘歸去。斜陽一樹黃鸝語。

韉紅

薄晴纔試。零香已盡。漫數徧紅盟翠訊。玉樓昨夜。月斜
風緊。又獨自衫羅半褪。小札緘愁。么絃傳恨。忍撇下
相思一寸。綠簫隔院。賦情偏準。也莫怪新來瘦損。

孤鸞寒夜聞雞

暗燈如豆。正愁怯單眠。立殘清漏。翠羽鄰村。喚醒晚來
昏酒。郵亭乍催夢起。趁霜花。漸濃時候。搖漾鞭絲帽影。
有落蟾痕瘦。悵夜長。無計成歡偶。慣碧樹窗閒。亂雅
啼後。獨自惺忪。不耐半衾寒透。空房更歆瘦枕。捲銀鈎。
悄窺疏牖。一樣曉風聲裏。向孤帷聽久。

萬年歡寒女機絲畫冊

簾影燈昏。正苔階露零。蛩語淒咽。錦雨飄梭。鉛點淚綃
紅浥。小字迴文倦織。問巧樣。何人能識。空凝想。月杵星
機。翠娥天上消息。嬋娟嫁遲恨積。向蘭閨暮寒。愁弄

刀尺。壓線頻年。羞翦綵鸞雙翼。闌夜無言自惜。怕負卻
傾城顏色。輸鄰女。繡袂當風。鏡妝濃試芳夕。

春草碧

春雨匝宵花事將盡

夜來風雨聲。閒亂紅樹頭。吹落多少。銅壺短。正深院愁
寂。醉眠侵曉。王孫未歸。大堤路。青驄望杳。還念去日。宮
袍溼。淚錦綴香草。春好。鏡闥歡夢闌。想素妝笑淺。暖
黛慵掃。人無語。掩繡戶。淒聽喚晴嬌鳥。濃陰萬重。勝情
共。煙叢翠老。陌上暮寒。斜陽外。燕飛到。

花犯 花陰

小闌干。濃芬壓處。簾紋散。新霽。佩環來未。儘遮斷。嬌塵。

纖影難記。幽叢悄指尋芳地。餘寒風正細。但隱約、斷襟
零袖。亭亭蘭霧裏。銷魂落英徧苔衣。黃蜂漫誤撲。仙
雲鬢。霏絳雨。東園路。亂扶花氣。攜尊共。采香伴侶。煙
漠漠。羅茵人乍起。又待取。瘦蟾搖夢。紅簫吹樹底。

惜紅衣 敗荷

碎影搖雲繁。聲喧雨翠銷涼。積露溼仙盤。圓珠尙流碧。
鴛鴦似語。渾忘卻。西風消息。恐憶低唱。采蓮有紅香狼
籍。荒汀淺渚。菱老蘆殘。斜陽共。淒絕秋心。展盡綠意。
瘦無跡。怕有浣紗人到。一鏡冷痕難覓。聽怨歌。催暮三

十六鷗能說

瑤華慢

寒柳

蒼寒斜日黯淡西風滿平堤荒驛江潭路遠煙水外誰
傍畫樓吹笛門前繫馬記不起冶春踪跡剩樓鴉點破
昏黃錯認舊時疎碧赤欄橋畔曾經綰不住行舟分
手南陌旗亭倚晚凝望眼一掾酒宿飄直千絲瘦影但
換了章臺晴色莫香閨翠袖聞時還問玉驄消息

陸麟書

字子愉鎮洋人道光十二年舉人

采桑子

水晶簾捲棠梨院曲折房櫳淺淡芳叢雨打桃花滿地
紅宿醒未醒春情倦昨夜疎鐘今夜東風夢到紅牆

第幾重

青杏兒

花雨溼銀鈎，關情處繡閣風柔，珠簾十二深深掩，一襟幽恨，瘦因郎瘦，羞爲郎羞。嘶馬板橋頭，問郎去何日。

重遊客程有盡，思無盡，願郎牢記綠楊門巷，小小紅樓。

符兆綸

字雪樵，宜黃人，道光十二年舉人，官福建知縣。

滿江紅

秋感

纔近涼天，已千樹商聲交作。况兼著淒淒樓笛，嗚嗚關角。雁響忽沈風力勁，鳥啼爭警霜華落。慘邊城無恙日，蕭條蠻山嶂。問籌策誰，帷幄問門戶，誰鍵鑰。莽鑪錘。

鐵聚九州猶錯虛說賈生前席召可憐祖述先鞭著漫
無聊酒盞合騷人尋秋約

朱緒曾

字述之上元人道光十二年舉人官台州同知

百字令

庚戌重修曝書亭和太史韻

稻花香裏趁秋風一舸梅溪重泊醞舫三楹經改拓柱
史丹青堪託槐汴煙晴茭池潮減願話豐年樂欣聯鷗
侶開尊爭賀新落憶自七錄翁來研經契古圖畫煩
斟酌隔歲經營今始就添得筆龕書幕種樹留鶯移花
引蝶細認新林壑竹孫龍護嶄然思露頭角

注

燕

字子黃秀水人道光十二年舉人官教諭

水龍吟簫

更無紫玉玲瓏別裁粉，
擗調商羽，漢宮誦罷，
秦臺仙後。賞音何許，
星點挨排，春纖悄按，
隨風徐度，怕鳴鳴吹徹。
尊前折柳，多半是愁中語，
無限幽懷欲訴，趁微涼自
修新譜。柔腸幾曲，靈犀一
點，分明通與。記否揚州良
宵月底，黯銷魂處，倩何人
喚取小紅，低唱款行雲住。

黃曾

字菊人，錢塘人。道光十二年舉人。官香河知縣，有瓶隱山房詞。

水龍吟

夏日偕同人過隱園，納涼荷亭，分賦得此。

置身恍在冰壺十弓地，
向瓊池借無多竹木，宜風宜雨。
最宜長夏石上科頭林邊，
跂腳炎氛不惹，聽蟬琴高處。

一聲聲過渾疑似薰絃罷
鏡裏闌干綠亞忽蓮歌悠
揚來也水平如練雲停如蓋儘堪圖寫塵外仙心香中
人語紅衣初卸笑萍錢萬箇算來不抵者清涼價

百宜嬌

絮影

映日依稀隨風蕩漾絕似離來倩女隔樹鶯窺當簾燕
睇引得梨魂無主旋來卽逝又閃到月華明處怪東風
吹雪無痕兒童欲捉還誤空悵望煙堤舊路踪跡本
如蓬漫勞尋取春水憐卿秋發似我鏡裏一般愁緒今
生總幻任幾點萍因參去只白描合付詞中補張三句
范如松

字君喬番禺人道光十二年舉人有書三昧軒詞

掃花游

餘寒未盡早釀就昏沈困人天氣天桃豔奪嫩嬌紅點
點枝頭樹底幾信花風已是楝花風起春老易忍待得
春來輕把春棄閒恨無可寄只勤喚黃嬌慵調綠綺
啼鵲何事又苦催春去欲留無計坐向松閒吹落滿身
空翠月明未且瞢騰背燈酣睡

項鴻祚

字蓮生錢塘人道光十二年舉人官福建鹽大使有憶雲詞

太常引

客中間歌

杏花開了燕飛忙正是好春光偏是好春光這幾日風
淒雨涼楊枝飄泊桃花嬌小獨自箇思量剛待不思

量吹一片簫聲過牆

菩薩蠻

擬溫庭筠

如今不合江南住
江南處處多煙雨
煙雨晚霏泊遊人未歸
犀株防膽怯玉筍揉藍
挹愁似暗潮生
自生還自平

浪淘沙

寫悶

蘭爐灺湘屏
蛛網簾釘林鶯捎落
護花鈴撒盡榆錢飄
盡絮春也零星
月又上窗櫺
風又泠泠墜歡如夢不
曾醒
只有烏龍眠自在
綠草閒庭

長亭怨

經年雁旅歲晚言歸慨念平生短歌當哭不獨爲三徑之荒也

更不信江南天濶散髮行歌敝裘寒裂款竹門荒翠樽
金縷久消歇此身如葉儘零落何須說若遇舊盟鷗莫
訴與年來蹤蹟愁絕對琴絲鬢影髣髴夢游時節玉
梅綻否怎簷角半枝枯折恨夕陽有限黃昏便捲盡一
林殘雪縱盼到春風容易綠陰啼鵲

江城子 吳門夜泊

金閨門外柳千條駐蘭橈度良宵可惜良宵都付與無
聊試喚吳孌歌一曲風又起雨瀟瀟雙鬟低映燭光
搖似花嬌最魂銷今夜魂銷明日隔楓橋城上烏啼催
酒醒人去也自吹簫

東風第一枝

春陰

更不成晴何曾是暝飛絲搖漾殘晝麴塵低照亭蕪茶
煙細籠院柳釀花天氣早釀得春醲如酒莫妨他油碧
芳期容易雨疎風驟縈絮粉模糊鴛鴦鋪棟雪迷離
翠岫凝雲著意商量湘波幾重皺皺禁寒作暖想未管
綠鶯啼瘦怎知人盡日恹恹悶過海棠開後

水龍吟

敗荷

瑤池昨夜新涼一匳環珮秋聲碎多應捲盡晴絲萬縷
靜香十里鶯悵盟寒鴛驚夢冷畫闌誰倚臘吳娃小艇
采芳重到料比似人憔悴可是淩波仙子嫁西風靚

妝都洗碧箔喚酒紅衣試舞舊歡難記怕點青霜怕逢
疎雨怕隨流水算關心只有跳珠零亂作相思淚

齊天樂

蟬

山童莫唱青林樂清商暗吹愁到桐翠垂簷槐黃糝徑
吟斷露昏煙曉疎簾夢覺待寫入琴絲和成淒調冷落
齊紈一襟哀怨更誰弔年年蛻痕未換剩西風鬢影
難寄幽抱碧樹無情斜陽易晚消受淒涼多少餘音自
嫺忍喚得秋來頓教秋老漫約孤蛩背燈啼夜悄

儀克中

字墨農番禺人道光十
二年舉人有劍光樓詞

浣溪紗

松溪舟夜

月暗堤長樹影連一星螢火墮濃煙夜涼如雨抱愁眠
只有蟲聲來枕底更無塵夢到鷗邊聽風聽水又經
年

卜算子

一夜雨聲多好夢無頭尾寒癭重衾養倦眸苦被鶯催
起隨意踏莓苔萬綠浮新霽開到辛夷第幾花劃向
闌干記

齊天樂

項里七夕聞鄰船摘阮

天涯怕見今宵月煙波况愁無際雁濶南徐人懷西楚
一片荒荒秋氣英雄已矣想兒女情深也曾揮涕星帶

河流葦蠶似訝客無寐
哀絲乍聞舵尾觸愁疑鐵馬
還擬金佩柳醒眠鴉橋歸倦鵲只是聲來迢遞曉風又
起歎天上人閒別離容易輸與沙鷗一雙雙夢裏

霓裳中序第一

題江鄭堂對酒當歌圖

浮生一夢蝶眼底雙丸飛不歇
歡事正須打疊况醅酒
哀絲好花時節雲停石裂任唾壺如意敲缺憑誰認客
星一點數載照揚越
休說鬢邊添雪算老去風情倍
切平生多少事業甚半付蘂鉛半付輪鐵壯懷空自熱
漫換得新詞幾闋江南好待君歸去醉譜竹西月

南浦

簾窗聽雨墜夢如雲盡日憐春閒愁似水用
玉田生詞韻賦之

夜雨隔篷聽乍成眠卻又啼鶯催曉墜夢覓江潯東風
軟况是閒愁難掃垂楊夾岸斷煙浮出青山小目送流
紅何處去魂醉王孫芳草 心頭無限江山向鳴榔聲
裏等閒過了新恨未分明銷凝候驀地舊愁都到迴眸
望渺而今燕語鷗盟悄一片歸雲留不住窗外夕陽多
少

河傳

夜雨幾許此時愁緒倩誰訴與梭梭窗紙不禁風朦朧
一燈如豆紅 梧桐偏牕秋深葉添淒切衾薄溫難熱
坐沈沈睡昏昏銷魂雨聲翻不聞

劉家謀

字芭川侯官人道光十二年舉人官臺灣教諭有斫劒詞

減字木蘭花

秋柳

秋風秋雨敗葉殘枝餘幾許一縷春痕留與征夫綰別
魂不勞攀折回首當年愁已絕那更長亭無數飛花
化做萍

山花子

七里橫塘半里山山光無數翠眉彎風亦多情吹客去
及吹還殘夢如煙尋不得露襟多少酒痕斑賸有舊
時杯底月忍重看

葉元埏

字牛生慈溪人道光十二年舉人官主事有海葯軒詞

摸魚兒 湖上觀打魚

漸湖心玻璃風起鷺鷥飛下涼影漁兄漁弟閒商略兩
兩三三相並搖小艇早轉過橋西劃破斜陽暝澄波似
鏡看白雨跳珠翠煙黏絮寒月載笳箚 高歌響幾曲
憑君細聽笑人塵夢難醒十年負了閒鷗約流水一條
無語今且問問若箇浮家肯與蓑衣分前山大茗山湖上山名
待霜後鱸香春時酒熟醉卧此閒穩

陳

澧

字蘭甫番禺人道光十二年舉人官河源教諭有憶江南館詞

點絳脣

送沈偉士之高州

江上長亭看君西去頻回首幾絲烟柳搖得斜陽瘦

水檻風臺簫譜闌珊後重陽又登高時候負了黃花酒

齊天樂

十八灘舟中夜雨

倦遊諳盡江湖味孤舟又眠秋雨碎點飄燈繁聲落枕
鄉夢更無尋處幽蛩不語只斷葦荒蘆亂垂烟渚一夜
蕭蕭惱人最是繞堤樹清吟此時正苦漸寒生竹簟
秋意如許古驛更長危灘溜急併作天涯情緒歸期又
誤望庾嶺模糊溼雲無數鏡裏明朝定添霜幾縷

鳳凰臺上憶吹簫

越王臺春望

芳樹啼鴉野花園蝶嫩晴剛引吟筇問故王臺樹依約
樵蹤零落當年黃屋都付與蛋雨蠻風添惆悵望佗城

一片海氣冥濛 青山向人似笑笑
淘盡潮聲誰是英雄
只幾堆新壘鳥散雲空
休說樓船下瀨傷心見斷鏃
苔封還依舊攀枝亂開萬點春紅

疎影 苔痕

空庭雨積新染成淺黛
延緣牆隙正是池塘春草生時
難辨兩般顏色閉門深掩
無人到已滿地翠烟如織
又暗添幾縷蝸涎裊裊篆紋
猶溼應誤迴闌倚徧怕行
近滑了穿花雙屐似淡還濃
漠漠平鋪只道綠槐陰密
黃昏小立成銷黯
恰看到斜陽成碧
謝樹頭吹落嫣紅
一霎破伊岑寂

摸魚兒

東坡江郊詩序云歸善縣治之北有磐石水潭可以垂釣予訪得其地紀以慢詞

繞城陰雁沙無際江光搖漾千頃蒼厓落地平如掌涇
翠倒涵天鏡風乍定看百尺澄潭中有東坡影林紆路
迴算七百年來斜陽過盡一片古苔冷幽尋處付與
牧邨樵徑江郊詩意誰領平生我亦煙波客蓑笠尙堪
持贈雲水性便挈鷺提鷗占取無人境商量畫幃向碎
竹叢邊荒蘆葉外添箇小漁艇

八聲甘州

朝雲墓

漸殘陽淡淡下平蕪塔影浸微瀾問秋墳何處荒亭葉
瘦斷碣苔斑一片零鐘碎梵飄出舊禪關杳杳松林外

添做蕭寒 不恨竹根長卧勝丹成遠去海上三山只
一坏香塚占取小林巒依約傍水仙祠廟有西湖如鏡
照華鬢休腸斷玉妃煙雨謫墮人間

高陽臺

元日獨游豐湖

清曙湖山釀寒城郭釣船猶閣圓沙短策行吟何曾負
了韶華水心亭子春先到看遙山綠近簷牙欠些些幾
縷垂楊幾點桃花 去年此日螺墩醉愛石苔留墨窗
竹搖紗底事清游年年都在天涯半生最識閒中味覓
山僧同說煙霞卻輸他斜日關門傍水人家

諸嘉杲

字子量仁和人道光十二年副貢生官江蘇州判有棗花簾詞

惜秋華

秋海棠同韻甫子述作

憔悴西風。恰夢痕盡醒。閒尋芳苑。釀就嫩陰。催開荔牆東畔。拚將數葉紅絲。把秋思十分勾綰。相伴只吟蛩啾唧。晚煙孤館。倩影暮涼颭。認檀心一點。離離淒怨。小睡乍酣。孤負惜花人遠。回思夜雨簾櫳。薦新酒。螺杯頻勸。腸斷數餘紅。闌干憑暖。

國朝詞綜補卷三十九

無錫丁紹儀杏船輯

蔡宗茂

四首
補詞

黎吉雲

一首

端木國瑚

一首
補詞

許謹身

六首
補詞

吳彌光

一首

姚燹

七首
補詞

孟鴻光

一首

梁廷楠

一首

彭崧毓

一首
補詞

金濂

一首
補詞

潘希甫

二首
補詞

錢聚朝

一首
補詞

章溥

一首
補詞

吳棠

一首

李光溥

一首
補詞

夏埴

二首

張亨輔一首

黃燮清十五首

陸以涸二首

孫宗禮九首
補詞

蔡宗茂

字小石上元人道光十三年進士官潼關道

百宜嬌

借友人十丈海觀荷

細雨梳煙暖風冒霧吹縐半篙秋水翠鳥飛遲白鷗夢
好人在菱荷香裏層樓縹緲看一朵仙雲成綺漸聲聲
竹咽絲柔隔花菱唱初起夕照外晴湖十里簾幙澹
湘紋蟹燈遙市鏡拭清漪扇搖團月徙倚波心亭子衫
痕鬢影恰寫出清涼如此鎮歸來三五橫空酒星明矣

浣溪紗

題桃花便面

流水三分月二分冰紈留得一枝春露華吹夢鎖簾紋
燕子樓臺琴語膩枇杷門巷酒燈昏江南何處不銷魂

高陽臺

黃蓼花惟中書省有之潘絳庭得其種寄乃兄功甫植之吳下賦詞索和

雁外風高鷗邊雲冷孤根遠託江湖鳳掖移將前身猶
戀菰蒲分來雨露宮壺貴傍閒庭小草沾濡鎮相依階
藥雙行苑柳千株秋容莫便矜紅紫說黃花籬畔一
例描摹佛果重參碎金委地曾銷涼痕攪入煙波去又
相思舊路麝蕪儘攜歸春夢池塘秋思萼鱸

又

題袁竹畦游吳詞稿

吳苑鶯花蘇臺烟柳等閒寫出清游嚼羽含商幾生慧
業能修君家兄弟機雲並繼倉山一代風流但淒然捧
月樓空笛冷蘋洲十年塵事渾如夢嘆星星霜鬢又
渡盧溝回首江南記曾虎阜勾留風鬟吹影春波綠放
蘭橈低亞簾鉤讀新詞畫裏溪山觸我閒愁

黎吉雲

原名光曙字月喬湘潭人道光十三年進士官御史有黨方山莊詩附詞

蝶戀花

題羅維垣畫蝶冊中有故友馮光祿題詩

憶昔南園芳草路駭綠紛紅多少尋芳侶燕子不來鶯
不語晚風簾幕飛無數無計勾留春且住重向丹青
認取翩翩舞惆悵題詩人已去夕陽紅冷冬青樹

端木國瑚

字子義號鶴田青田人道
光十三年進士官中書

百字令

殘菊

水晶簾捲恁西風吹老難開笑口白糝籬邊霜信早又
過啼螳時候破帽黏苔空庭敲石漫記重陽就閉門孤
峭一尊猶剩殘酒 獨自歸臥柴桑鬢絲偷換秋共長
松瘦車馬人閒蜂蝶散留得南山依舊落落仙心稜稜
傲骨靜極原宜壽誰憐清苦夜深襟露涼透

許謹身

字金橋仁和人道光十三年進
士官兵部主事有師竹軒詞

河傳

天曉寒峭宵來風雨落紅多少春愁暗上眉尖慙慙道

聲休捲簾 簾櫳貼地人思睡偏憔悴昨夜何曾醉夢
纔成恨黃鶯頻驚隔窗啼一聲

洞仙歌

者遭離別但亂頭粗服那有心情弄膏沐怕柳梢殘月
勾起閒愁黃昏後不到曲闌干曲 燈花連夜卜盼得
書來喜煞歸人此番速未暇訴相思一裘輕綃先看取
淚痕盈幅記前度香囊繫郎腰怕斷了橫條教儂難續
又

片帆江上又西風催客素手雙攜忍輕擘嘆緣如夢短
情比絲長渾不料歸去蕭郎非昔 綵雲容易散燕子

樓空舊日房櫳總寥寂種得碧桃花未到開時聞吹落
晚風何急算涼月團團似當時只簾幙重重照來明白
又

舊情歷歷早窺簾人遠綺夢闌珊一場短怕明年春到
梁燕歸來竟失卻昔日雙棲庭院銖衣已煙散惆悵
何曾算只當初悔曾見是道莫相思眼底心頭有多少
賺儂幽怨看萬丈遊絲最纏綿便似翦春風也難吹斷
又

明燈上了正懨懨時節獨自登樓暗愁絕看鏡奩蟲網
繡榻塵封梳裹處依舊晶簾還揭那回曾小立第一

銷魂悄步西階刻羅襪倚徧曲闌干豔影模糊便思著
更和誰說猶錯認春宵墮金釵卻秋雨侵窗幾聲落葉
金縷曲

多少傷心語似春蠶纏綿不盡情絲萬縷埋怨東風簾
外急吹得落紅無主是一樣沾泥飛絮雲裏樓臺雲外
望好和伊指點曾游處且共話夜窗雨少年應悔才
名誤笑而今聰明休問雕龍繡虎還憶篝燈遙夕事歷
線年年辛苦更漫說蛾眉翠嫵別院杏花紅正好不分
明十里長安路鈴繫否有誰護

吳彌光

字章垣南海人道光十四
年舉人有芬陀羅庵詩

滿江紅 赤壁夜泊

莽莽江聲流不盡英才雄略想當日舳艫銜結旌旗閃
爍豪氣臨江宵酌酒高歌對月人橫槊到如今赤壁曠
嵯峨仍環郭前一度南飛鵲後一度東來鶴奈山川
猶昔煙雲非昨萬疊波濤愁路遠雙崖風月和帆泊算
千秋兩賦有坡仙難重作

姚

燹字梅伯號野橋鎮海人道光十四年舉人有疎影樓詞

菩薩蠻

十三絃子銀箏腕十三管子銀簧媚樓影翦涼波綠雲
天際多纖鸞搖翠羽人倚風鐙語冷碧唾蘭紗煙絲

斜冒花

一落索

獨立亂紅深處。背風無語。怪伊蝴蝶繞人飛。卻不向、花
邊去。重上畫樓日暮。江煙催雨。帆來帆去總依稀。惱
多種、垂楊樹。

少年遊

曲瓊低押重簾靜。煙氣夕沈沈。繩繩雁去。鸞鸞月上。寂
寂此時心。玉釵墮響。誰重覓粉暈。徧羅衾。瘦影依燈。
斷腸聞笛。夜淺夢難深。

愁倚闌令

垂茜袖側金釵立蒼苔昨夜陰陰微雨過海棠開
人無限春懷歌聲隔楊柳池臺簾幙疎疎風仄仄燕飛
來

解蹀躞

雪影

是否梨花柳絮天暝恰無月但和簾底梅魂盪清切
又隔燭低吹滿衣拂冷愁雲惹迴吟靨
蕊珠闕翦碎
瑤妃袞裙蕪煙忽遮滅又隨疎樹風梢半斜折一片虛
白窗櫺幾迷春夢殘痕萬千蝴蝶

祝英臺近

鳳眉青鴉髻皁妝抹總清妙素素紅紅一蕙兩心抱那

回蠟粉廊西深深桐葉除明月更無人到
睡鸚梢片時攜手沈吟佳約有誰曉煙雨鶯湖一舸甚時好安排
詩硯茶鑪布衾竹箔須莫忘夏初春杪

百宜嬌

秋日客園見桃花

冷露含心碎煙篩夢堪比那時嬌俊略帶清癯似憐遲
暮未了東風殘恨禁伊體弱挽翠袖竹邊寒並甚真娘
魂斷生綃幾回低喚難醒空悵桐衣香鬢影三月鉤
車歸舊情誰準絕溯荒山亂鴉落葉一角仙源雲暝相
逢若夢惹此後相思重整伴斜陽啼老疎蟬更無鶯問

孟鴻光

字蒲生番禺人道光十四年舉人

金縷曲 題友人醉禪小影

塵夢難追省拚付與幕天席地一場酩酊借得吾師杯
渡法宮海風波纔定僥倖得六根清淨溼透青衫當日
溪是香山居士禪中境聊一現幻泡影半生踪跡如
萍梗况頻經驚雷震耳新霜黏鬢欲改本來真面目生
恐鬚眉未肯忽悟澈醍醐灌頂世味飽嘗成道味算從
前非醉今非醒閒寫作畫中景

梁廷楠

字章南順德人道光十四年
貢生官中書有藤花亭詞

齊天樂

倪君雲癰囑題珠海夜遊圖漫倚是解

星燈倒映珠波活何人野航恰受蝶拍脰勻鶯喉聲脆

逗起閒愁如舊杯濃珀酒漫染徧青衫拋殘紅豆絲竹
哀豪更饒壯氣射牛斗清宵乘興行樂愛篷窗夜爽
真未曾有初日年華明霞才調不脛聲名飛走人同緒
柳看寫入圖中苦吟肩瘦來夕憑檣許儂橫笛否

彭松毓

字子蕃江夏人道光十五年進士官雲南迤西道有求是齋詞

沁園春

橄欖

懷橘人遙節近傳柑青青喜瞻看筠籃翠溢珠丸一掬
瑛盤香漬玉指雙拈澀比檳榔苦同茗薜齒拒眉攢不
用嫌君須記莫信他巧語口蜜專甜試將名字題籤
覺諫院風規婉勝嚴想丹忱朝啟櫻厨罷宴綠章夜奏

蓮炬垂簾饌撤邪蒿詔停貢荔往事思量斌媚添卿姑
耐待功收藥石佐以晶鹽

鹽漬者可
以已疾

金 謙

字讓水仁和人道光十五年
進士官庶吉士有壓線詞

徵招

西樓對雨

畫樓人立西風裏蕭蕭滿城涼雨暝色壓遙峰只眉痕
微露天涯歸騎阻料香濺軟紅塵土翠溼溟濛幾家庭
院幾重煙樹秋緒未分明寒鴉外一啄釀成淒楚點
點入愁心更芭蕉聲苦登臨嗟倦旅間鄉思蒼茫何處
又誰見別淚千絲隔簾波偷注

潘希甫

字補之吳縣人道光十五年舉
人官內閣中書有花隱庵詞

湘月

和家功甫舍人內閣黃蓼花

冷紅碎點慣年年水國涼思孤迥一雁南來別寄得伴
月昏黃詩境約客鋤煙留君聽雨鳳掖巢痕賸糝金池
沼曲闌待我同凭爲問閣下文章元和舊體換翻新
蹊徑載酒斜街莫更道萬里鷗邊名姓傍砌移苔分畦
對菊門掩斜陽靜葵花屏底矮牋替寫秋影

蝶戀花

又是天涯春去後和夢和愁情緒濃於酒似水新寒簾
底逗更誰替把鴛衾覆數盡蓮籌窗曙否推枕徘徊
起倚銀屏久別院玉簫聲似舊刺桐花外涼蟾瘦

錢聚朝

字曉庭嘉興人道光十五年舉人官瀋安教諭

慶春宮

春雨遺懷

山影沈煙。湖雲疊樹。曉窗人起簾卷。中酒情懷。惜花天氣。者番愁緒怎遣。微吟擁被。任翠袿、憎寒鎮斂。思量不信。逝水華年。夢長春短。卻教錯怨東風。故故吹來。雨絲難斷。低徊無語。雕闌頻倚。待約尋芳猶嬾。散花人去。只一日。迴腸萬轉。流鶯催暝。便過今朝。已愁今晚。

章

溥

字寶華嘉興人道光十五年舉人有蕝花間詞

百字令

秋蘆

煙梢織暝。蕩寒波一片。低窺雙鷺。兩岸微茫。吹笛冷界。

破蓼汀蘋渚枝染霜痕花含月色葉颭疎疎雨西風瑟瑟耳邊涼做秋語遙指卅六灣頭楓丹露白渺渺人何處頭白江湖搖落後無限夕陽洄溯塞雁聲淒鄉鱸夢遠減盡征衣絮一篷晴雪漁郎吹火歸去

吳

棠

字仲仙盱眙人道光十五年舉人官四川總督謚勤惠

金縷曲

題劉玉叔詞稿用集中韻

華髮催人急怎十年胥江一棹荻楓瑟瑟憶到莎廳慚讀回首已非疇昔喜到眼花騰五色二陸雙丁爭炫映兼謂哲弟兄洲生譜雲和共羨江郎筆休惆悵踞牀笛飄零我是無家客問故巢而今安在劫灰悽惻猿鶴沙蟲成

幻夢填海冤禽何益歎窮渺天心莫必起舞中宵雞膺
膊撥銅琵琶咽江聲清緘愁思素書尺

李光溥

字競自仁和人道光十五年舉人

滿江紅

題黃韻甫帝女花院本傳明季坤興宮主既殉復蕪後仍下降事

一雲歌場有無限滄桑慨惻渾閱盡綺羅蓬葆鐘魚瑟
瑟並蒂蓮開心自苦殘枝藕斷絲難擘問畫眉深淺入
時無無言泣 塵劫換紅羊卮星度朗紅鸞吉怪鵲啼
鵲噪恁般淒寂完璧一雙存國寶聘錢十萬邀 天錫
倩排當了結再生緣才人筆

夏

堧

字子俊江甯人道光十五年舉人官知縣有篆枚堂詞

綺羅香 春水

洗夢無痕照愁有影何苦盈盈如此曲曲柔腸化作一
江春水剛換得幾尺新潮還攪著舊時清淚又匆匆送
盡歸帆落紅卷浪艣聲起 年年鷗鷺望我見說前盟

尙在蘋花風裏可惜春歸孤負故人雙鯉便濃似百斛
春醪渾不醉天涯游子怕依舊吟斷回波去來潮信駛

高陽臺

潘功甫舍人得其弟紱庭移歸內閣黃蓼
花賦詞相和率爾繼聲

宮額凝嬌仙肌暈粟亭亭紅藥階邊康樂池塘相思冷
抱秋煙西風送到鬢雲朵是舊時天上曾看喜年年秋
圃黃花作伴霜前 長安回首江湖夢記疏紅澹白冷

塵吳船布地金沙多生未識香禪色絲聽唱雙聲譜想
鳳池涼露娟娟駐秋顏盼到槐黃祝爾眉開

張亨輔

原名際亮字亨甫建甯人道光十五年舉人

百字令

有贈

料伊妝閣對菱花蕭瑟慵開笑口顧影徘徊頻自照一
日腸應迴九翠被香殘寶箏塵滿宛轉惟搔首夕陽二
抹照人啼笑俱有惆悵連夜清歌月明醉倒扶倩纖
纖手別後依然還見月也似雙蛾消瘦破鏡難圓短篷
獨泊何處沽尊酒憑誰寄訊昨宵燈畔孤香

黃夔清

原名憲清字韻甫海鹽人道光十五年舉人官湖北知縣有倚晴樓詞

花非花

花非花夢非夢夢裏來花前送四更斜月五更風格外
春寒今夜重

采桑子

玲瓏亭子分三面一面迴廊一面紅牆一面闌干靠夕
陽木樨香和茶煙膩才出紗窗才整羅裳人倚西風
語亦涼

減字木蘭花

隔院聞絃管聲

舞紅歌翠酒座尋常拚一醉醉也瞢騰不解傷心不會
聽錦毬春豔簾外梅花偏冷淡花是愁根生怕重銷

笛裏魂

卜算子

湖樓

辛苦爲尋春，怎奈春歸速。流水盈盈不見人，煙雨封簾角。
別緒總無聊，前夢真難續。芳草垂楊共一堤，各自傷心綠。

南歌子

繡枕扶還怯，羅衣著尙單。一年春已病中完。底事東風，猶作去，不情寒。
綠意詩難寫，黃昏酒易殘。冷螢拖月上，關千，可惜無人同倚畫樓看。

鵲橋仙

送張松溪之袁浦

無多舊雨無多新雨各自燈寒酒醒月明何處弄瑤笙
怕冷了西湖花影 秋聲碎夢秋風催別漸漸鬢絲涼
滿篷窗吟徧六朝山只載得閒愁一艇

浪淘沙

秋意入芭蕉不雨瀟瀟閒庭如此好良宵月自纏綿花
自媚人自無聊 別恨幾時銷認取紅綃鳳箏音苦雁
書通醒著欲眠眠著醒燈也心焦

蝶戀花

小院悒悒芳事暮落了黃梅減了青梅數水漾簾痕風
約住有人立向無人處 金線拋殘閒繡譜葉葉芭蕉

漸漸濛窗戶一片晚陰消不去鷓鴣先定黃昏雨

八聲甘州

借文粹庵錢筱圃由南浦泛舟江上看桃花

泛沙棠艇子載閒鷗來尋異鄉春看長江似醋東風如
酒漸醉離人誰染胭脂萬樹襯醒遠山痕不在天涯看
已是銷魂休說畫樓人面便露根煙葉盡種愁因記
流鶯門巷花影織成雲好天台嬋娟輕別歎阮郎猶未
厭紅塵清明近又歸期誤了事事因循

珍珠簾

簾影

移來六幅湘煙軟悄悄襯貼迴廊幽蔭只許夕陽通
漫放他歸燕略有微風飄颺起誤帶出晚妝花片人面

盡空濛瀟灑碧雲同遠 曾憶十二闌干映高梧垂柳
波紋斜展細露一燈紅正夜涼初捲別後相思惟夢到
錯認他明河清淺亭院帳月淡星疎那回羅幙

齊天樂

車燈

平原碎碾淒迷影輕隨畫輪移去瘦借煙肥昏憐露隔
紅暈馬蹄塵土殘更四五鎮一點心焦悶天難曙閃過
垂楊短長亭外數星聚 高樓今夜睡未料香篝倦倚
清夢誰煮翠袖占花金釵剔欲應念荒寒愁旅紗籠細
補渾不是羅帷少年聽雨照醒離魂不眠人最苦

疏影

癸菊

霜華似酒向枝枝點染芳豔酣透冷到籬根倦倚窗前
苔痕一徑鋪厚寒蛩嬾作傷心語便蝶影飛來都瘦卷
畫簾盡日西風分付秋魂消受記得餐英小摘那人
共徙倚香滿羅袖好夢如煙別夢如雲又到苦寒時候
謝娘已嫁吳娘病只院落夕陽依舊算可憐不獨黃花
說與雁鴻知否

倦尋芳

春日偕友泛高士湖

畫橋路轉匳水波明新漲如許破曉東風吹起盪春情
緒弱柳搓絲黃似月叢花疊影紅成霧倚孤篷載雙柑
斗酒醉尋煙雨恰正好清明纔過一笑青山齊展眉

嫵拾翠評香難得俊遊閒侶燕子人家炊笋飯鷓鴣村
店留茶語儘風流又何須畫船簫鼓

淒涼犯

秋暮登陶然亭

霜痕乍積西風起高城盡帶寒色采蓉路渺思莼夢阻
最傷游歷浮沈浪跡問燕市屠沽信息歎荒臺黃金寂
寞熱淚向誰滴無計舒懷抱借酒看山爲花移屐登
臨念遠望佳人暮雲天碧欲諱離愁奈青鬢絲絲露白
羨南飛落照萬里雁影直

燭影搖紅

題徐秋宇孝廉錦華黃葉秋燈歸思圖

日落燕臺亂鴉啼近黃昏候不多庭樹弄秋聲聽得人

消瘦寒到霜前雁後忍思量江南病柳畫屏孤倚一穗
心焦化成紅豆曾記聯牀夜闌愁語同搔首九遠煙
月足勾留開醉銷魂酒酒醒無聊依舊爲離人疏更偏
久未堪重憶帳曉鑪溫蠟殘珠溜

陸以湘

字定圃桐鄉人道光十六年進士官杭州教授

金縷曲

乙未夏日留滯都門偕同人避暑寄園園在城西爲趙天羽給諫故居

故老吟踪賸百餘年風流歇絕室廬猶韻宦隱園林稀
熱客片席名山棲穩溯往事殘碑同認手種榆株高出
屋鬱蒼蒼界斷紅塵境新月上瀉涼影闌干十二通
花徑想尊邊掀髯嘯傲幾經閒凭跪地筠簾低不捲半

榻鑪煙搖暝似前度敲詩清景雨過空堦苔翠合早一天秋意來疏鬢茶夢熟北窗枕

又題周鐵霞藕湖泛月圖

關鴨關邊路儘詩人煙波嘯傲放懷朝暮彈指番風催信早一夜紅英徧吐又咏就攀芳新句畫舫沿流忘遠近看娟娟纖魄遙峰露香霧外曳柔櫓頻年浪跡拋吟侶想姮娥多應笑我抗塵何苦千里扁舟尋舊約重訪畫中林鴈傍水國移家小住三五涼暉邀共醉待更關便宿花深處清夢穩狎鷗鷺

孫宗禮

字定甫江都人道光十六年進士官澄邁知縣有二十四橋吹簫譜

浣溪紗

虹橋春泛

又是鴛鴦起綠波
茫茫春水照愁多
傷春不了奈春何
日日湖干尋一徧
東風何處儘消磨
十三樓外怕經過

祝英臺近

梅影

霧迷迷煙靄靄
何處暗香繞
擬向雕闌待折一枝好
上聲
只愁半縷柔魂呼他不起
算都被夢痕遮了
笛音悄
吹上明月三分二分爲誰照
瘦骨娉婷可似那時貌
有時別後相思檐前檻外聽
點屐聲聲尋到

減字木蘭花

霜花

初涼亭戶鴛瓦霏霏曾幾度開落誰知卻在寒鐘未曉
時征衣曾點衰草離披秋正遠認取芳痕茅店荒雞
喚一聲

卜算子

何處是江南寂寞春魂醒一夜梨花落已空愁煞東風
影陌上客匆匆漫怨香車冷知是人家上塚來歸路
煙郊暝

摸魚兒

春泥

了無痕雪融沙漫東風消息初軟依稀十里江干路草
色一番晴轉飛絮婉記半點沾來已礙游絲冒愁深印

淺任逐向雕輪踏翻雲屐都送綠蕪遠 煙郊外無限

斜陽影戀扶筇剛又行徧香芹可許營巢用辛苦隔年

雙燕春思

去聲

倦怕落了殘紅容易和成片芳塵漫捲正

叱犢人歸攜鋤逕滑疎雨一犁濺

揚州慢 玉鈎斜

坏土深深淒煙漠漠此閒埋玉誰人是繁華小劫怕認
取前塵賸當日飛瓊一樹杜鵑聲裏啼斷殘魂看天邊
眉月纖纖終老黃昏 錦帆去矣恐迷離幽怨猶存算
草長紅心花開碧血都化愁痕二十四番風過雷塘夢
記也難真又荒涼螢火宵來飛上孤墳

憶舊游

吾郡休園 國初鄭君歸隱地也後爲陳氏別墅修葺一整門闥四闢長松鬱蒼曩

余讀書樓中頗極徙倚之樂戊戌秋重過竟成荒蔓昔塵若夢往事如雲賦此誌感

問當時池館因甚而今上了苔痕未是西風到已荒寒
做盡暗裏消魂十年舊游能記曾與寄閒身只一片斜
陽多情依舊紅上重門 紛紛鴉陣晚漸花境淒涼夢
境溫存畧說尋幽興半煙迷草暗月冷燈昏便有碧窗
低護少箇倚闌人臘石磴空支蒼茫那日秋樹根

齊天樂

白秋海棠同汪大竹夏詞仲汪飲泉金簫伯潘小江朱湘蘭作

涼花欲做淒清景疎疎自成媚楚倩影難描香痕太瘦
依約紅闌干路無端夢阻算愁近黃昏又愁風雨莫認

羣芳未隨凡豔鬬眉嫵
鉛華何事淨洗賸柔枝的皪
搖曳誰主澹不勝秋嬌還惹恨腸斷幽閨兒女相思幾
許恁鎮日低頭背人無語只有姮娥怨懷常訴與

瑣窗寒

消寒第二集朱震伯齋中同作得雪意

驀地濃陰搖晴弄暝暮天如水西風瑟瑟卻被亂雅催
起想空山寒梅半開幾時踏遍孤芳底漸晚燈上了依
稀煙外有人凝睇曾記陳狂事記灞岸橋邊舊游已
矣山村夢好又把詩筒裝理問征鴻歸也未歸凍雲漠
漠來萬里待宵深定有飛英準擬柴門閉

惜紅衣

風絲零亂景色可憐喚艇延秋淒然有感

粉莉消香媚筠淡影嫩涼初覺買得爪皮清游渾如昨
疎楊四面偏解戀闌干一角依約香夢甚時被西風搖
落 湖光十里腸斷年年淒然渺珠箔微吟薄醉此意
向誰託多謝二分明月還認舊時樓閣怕夜深歸也驚
起白鷗飛泊